

蔣君抑卮家傳


上海图书馆藏书



A541 212 0017 4176B

蔣抑卮先生遺像

葉景葵
敬題



蔣君抑卮家傳

君諱鴻林譜名玉林字一枝又字抑卮先世自諸暨分支遷蔣家坳再分支遷賞坊高祖殿選公遷杭州積善坊巷設酒肆曾祖瑞麟公祖德山公世其業父海籌公渡江避洪楊之亂亂定襍被回杭爲繅絲業與織綢業作媒介勤儉居積遂設肆營業於積善坊巷卽世所稱蔣廣昌綢莊者也配楊氏生子錦洲繼配余氏生君海籌公夙興夜寐處理業務錦洲副之奔走於外準南達閩廣北及遼瀋信用蔚起營業繁盛錦

上海圖書館藏書

洲無暇讀書乃令君出就名師習舉子業君以
商籍應童子試補錢塘縣學生員又以公報効
賑捐得獎分部郎中籤分民政部君厭棄帖括
性又不喜爲官乃銳意學問喜讀深奧繁難之
古籍及清儒聲音訓詁書從章君太炎服膺所
著書曰文始於文字孳乳與後世音讀之演變
能舉其大凡光緒甲辰乙巳間游學日本交游
寢廣遇資斧不繼者喜仗助之尤與周君樹人
投契惜因耳病未克竟學憤國勢之陵夷研究
彼國資本主義之所以勃發知金融與實業關

係至密會江浙鐵路拒款事起卽回國佐湯蟄
仙先生創立浙江商辦鐵路公司招股將近千
萬以爲非辦理銀行不足以資周轉乃與同里
紳富創立浙江興業銀行由鐵路公司認資本
之半爲公股餘招商股羣情疑沮君乃首創墊
款之議遂於光緒三十二年成立設總行於杭
州次年設分行於上海漢口當選爲董事至宣
統之季杭滬鐵路已通用款日繁銀行又享有
發行權革命猝發總分行支應存款與兌現驟
感竭蹶幾瀕於危賴君百方救援出私財以濟

急風潮始乎入民國後君以爲現行制度散漫無紀謀革新之其時正擬收回鐵路公股完全商辦乃草定章程遷總行於上海改爲總辦事處制行之十餘年後雖逐漸蛻變而大綱莫能越其範圍洪憲之役政府限令中交停兌舉國震駭百業停滯中國銀行當局博徵衆議君爲代謀復興之策切中窾要民國初浙江地方實業銀行官商股爭議分析君亦設計調停識者稱之君之智略過人如此君性孝友海籌公居家約而治事嚴君能計畫裨益之有不當老人

之意者必委曲將順無敢拂逆父沒奉余太夫人就養有所需必敬諾無違命錦洲早逝君撫其子若孫與己之所出合塾以教就傅時遣入各學校並於家分別延師補課不稍惜費凡畢業者擇尤資遣游學使各就專門深造君善讀書亦喜聚書所藏約五萬冊遺命捐贈合衆圖書館並捐助基金五萬元海籌公本有在蔣家坳獨辦小學之意君遺命遵行之並命於賞祔辦醫院除海籌公預定基金外再捐助小學校基金五萬元君之克敦內行而孜孜教育文化

事業至死不倦爲晚近所難能也民國廿九年秋忽染傷寒症甚危治稍愈又患腸穿症成腹膜炎施手術無效延至十一月十八日卽庚辰年十月十九日逝世君生於光緒元年五月十四日享年六十六歲元配孔氏生子三世俊世逝世適女一童祁側室潘氏無出次華氏生子二世顯世承女五思壹思徽思貞思善思安次戴氏無出孫男女共十九人光緒三十三年余與君相識於漢口次年浙江興業銀行聘余爲漢行經理又一年當選爲董事由是一室共事

晨夕商榷者至今三十餘年先後開拓分支行
歲時巡察往往舟車共載遇有疑難之事反復
研求君心思銳敏而又精於鉤稽頗能補余之
短卽有異同爭辯彼此不敢苟阿而其終必歸
於一是互相推服近年君多病始患胃潰瘍後
因蹉跌傷外髀骨呻楚經年神態消瘦今春以
後稍強健不料竟以傷寒症辭世臨危前數日
執余手以家傳相託唯唯不敢辭余雖不文而
知君之深固莫余若謹次平日所見聞以質實
之言貢諸當世藉備史官之采擇所以報故人

之託自信無溢美之辭焉

愚弟葉景葵頓首拜撰

上海图书馆藏书



A541 212 0017 4176B

318511